

Friûl di Jevât

PAR CURE DA LA SOCIETÂT FILOLOGJICHE FURLANE

Vie Bellini, 3, Guriza - tel./fax 0481533849 - gortzia@filologicafriulana.it - www.filologicafriulana.it

Par cure di Enos Costantini la storie da la vît e dal vin in Friûl e a Triest



Setambar, timp di vendemis: in Friûl, da lis gravis fin al Cuei, il vin nol è dome une ativitât economiche une vore impuartante, ma ancje culture dal teritori. Chest e tant di plui al è "Storia della vite e del vino in Friuli e a Trieste", il libri rincurât di Enos Costantini, publicât che nol è tant da la Forum di Udin e promovût de Academie taliane da la vît e dal vin: di fat chest volum al jentre a plen titul a fâ part da la golaine "Storie regional da la vît e dal vin in Italie". Un libri di passe 700 pagjinis cun plui di 40 intervants di cetancj esperts che nus contin i diviers aspjets da la storie de vît in Friûl e a Triest. Une sezion e je dedeade al Friûl (che par altri al è une da lis regions europeanis indulà che plui di dut si à vût scrit di vîts e di vins) e une altre a Triest (rincurade di Fulvio Colombo, forsit la prime opare di sintesi da la storie dal vin tergestine). Nol è un altri cjapitul da la storie cence fin di rivalitât jenfri Friûl e Triest, ma al è poc ce discuti: Friûl e Triest a àn vût storiis (ancje enologjichis) dal dut diferentis.

Chest nol è dome un libri di storie, al è ancje un preseabil aprofondiment su chel che al sta ator di vin e vignâi. Ve alore saçs su la art e po ancje su dutis chês altris ativitâts leadis a chest setôr: paisaç, gjenetiche e evoluzion, sgnape, asêt, cooperazion, etichetis, museus e in mò cetant di lei di gust, un pôc a la volte come cerçâ un bon tai.

O vin cumò un imprest formidabil a disposizion da la nestre viticulture: intun moment là che cui che al bêt al vûl savê di

Il vin, no dome economie ma ancje culture e teritori

indulà che al ven il vin che al consume, chest libri al devente un messaç promozionâl fundamentâl par la nestre produzion. No je dome une cuistion di bevi un bon tai - blanc o neri al è compagn - ma al è bevi il lavôr di une colture, di une culture, di une identitât di passe doi mil agns che e sta daûr a chest prodot. In cheste enciclopedia dai vignâi di chenti a son dentri ancje intervants dedeâts a la storie da la vît e dal vin tal Gurizan: dongje dal articul di Luciano Jacumin sul vin inte Aquilee romane, o cjatin ancje Enos Costantini che nus conte dai vignâi che a àn fat la storie dal Cuei. In chest contribût, dongje da lis vîts, a son nomenâts i protagoniscj da la storie dal vin e da la vît in rive dal Lusinç: Ferdinando Giuseppe d'Attems, Giuseppe Domenico della Bona, Matija Vertovz, Alberto Levi, Giovanni Bolle e altris in mò. E in cheste schirie no si pues no ricuardâ la gloriose istituzion tant dal imperiâl e reâl istitût chimic-agrari sperimentâl di Guriza, tant di impuartantis cunvignis come il IV Congrès enologjic austriac, tignût propit a Guriza dai 16 ai 20 di Setembar dal 1891. Chest articul al è ancje un ricognossiment

a la int dal Cuei, i "cogliani", che par secui a àn lavorât chescj cueis, implantât vîts, passât vueris, sopuartât e po superât confins che no son mai esistûts e che cumò a cjatin il just ricognossiment cu la cualitât dal lôr lavôr (unic marum, par Enos Costantini, chel di no jessi rivâts a tignî dongje da la Rabuele ancje altris vîts di chenti). Francesco Marangon al definìs chescj viticultôrs "strong people for a bright future / brave int di bieles vignude": cussì l'autôr al siere il so articul, che al ricognòs no dome il valôr economic dal vin pal Friûl cumò come pal avignî, ma al ricuarde ancje altris aspjets fundamentâi tant che la multifunzionalità di cheste produzion agricole (no dome economie, ma ancje tutele dal ambient, disvilup rurâl, sigurece alimentâr) e il valôr economic dal paisaç metût a vignâi (che nus permet un biel vivi e un bielvedê). "Storia della vite e del vino in Friuli e a Trieste" al è duncje un libri impuartant che al merete di jessi cognossût, let e resonât da la nestre int, par savê ce grant tesaur che o vin chenti e che al è preseât ancje dai foescj (il Cuei... *docet*).

Feliciano Medeot